

Papru

KURINTIUNMAYA SHUARAN

ATAKSHA papin aar akuptukma

Kurintiumaya Yus-shuaran Papru áatramiania nu

1 ¹Wi Pápruitjai Jesukrístu akatramu. Yus nuna wakerakui ni akatramurí anaikiamuitjai. Ii yachi Timiutéujai Yus-shuar Kurintiu péprunam íruntrumna nuna áatjarme. Kame ashí Akaya nunkanam Yusna ajasurmena nunasha áatjarme. ²Apa Yussha, ii Uuntri Jesukrístusha shiir enentáimturma ásar imiatkinchanum tuke shiir pujustinian yáinmakarat tusan wakerajrume.

Papru wáitsamurí

³Ii Uuntri Jesukrístu Aparí, ii Yusrí ana nuna naarí uunt awajsatai. Niisha ii Aparínti. In waitnentramaji. Tura Niisha ii Yúsrínti. Tuma asa in tuke atsantamji. ⁴Ii wáitajnia nui Yuska in atsantamji. Tura in atsantamjia nútiksarik iisha chíkich shuar wáitainia nuna atsankrarat tusa túrutmaji. ⁵Warí, Kristu wáitsamurí núkap pachiinkiaitjia núnisrik ni atsankramurín núkap pachiinkiaitji. ⁶Tuma asamtai, wáitajnia nu, Yusa uwemtikrampratniurí tura ni atsankratniurí atumsha takustarum tusar wáitaji. Tura Yus in atsantampramjia nu, Yusa uwemtikrampratniurí tura ni atsankratniurí átum takustarum tusar atsankramuitji. Wats, átum uwemtikramu tura atsankramu asarum, ii wáitsajnia nútiksarmek wáitiayatrum shiir enentáimsarum katsuntramniaitrume. ⁷Tura “túráttawai” tu enentáimtajrume.

Warí, átum ijjai métek wáitsaitrume. Núnisan ijjai métek Yus atsantamtsurmek.

⁸Yatsurtiram, iikia Asia nunkanam ti itiurchat wáinkiamjinia nu nekaatarum tusar wakeraji. Imiá itiurchat wáinkiar iikia katsuntratin jeachmaji. ⁹Nu itiurchatnumiá “iwiaaku jíinkishtatji” tu enentáimsamji. Túrasha “iikia tujinchaitji” tu enentáimtumatsuk, antsu jakamunmayan iniannua nú Yúsan enentáimtusarat tusa nu túrunamji. ¹⁰⁻¹¹Jakamnia itiurchatnumiá Yuska uwentikrampramji. Tura yamaisha uwentikrampratajtsa pujurtamji. Tura atumsha in Yus áujtakrumniñkia “Yuska tuke uwentikramprattaji” taji. Tura untsurí shuar Yus aujsa asakrumin, ii uwempra asakrin untsurí shuar Yúsan yuminsartatui.

Kurintiunam wau wéchatniun Papru ujakmiania nu

¹²Yatsurtiram, ju nekaatarum tusar wakeraji. Ju nunkanam pujusar tura nekaska atumjai pujusar anantsuk tura Yus umirkar wekaimji. Aya ii nekatairijjai wekaichamji. Antsu Yus in waitnentrana asa péñker wekasatniun yainmakmaji. Nu nekaar shiir enentáimji. ¹³Áatjarmena nu páantaiti. Átum áujсарum nekaatin jearmena nunak aarjai. Chikichan nekaachminian aatsjai. Péñker nekaatarum tusan wakerajrume. ¹⁴Ishichik nékayatrumek nú núkap tuke nekaki wetarum tusan wakerajrume. Nuñkia Jesukrístu tátinia nú tsawantai átum winia shiir enentáimtursattarme. Tura átum péñker wekasa asakrumin shiir enentáimtustatjarne. ¹⁵Tura ii shiir enentaimtuniaj nuna nékakun ataksha Yusá waitnenkartutairi nekapsak tusan ataksha atumiin irastinian wakerimjai. ¹⁶Masetúnia nunkanmaani wéakun írkuta nankaikitjarum tusan enentáimmiajai. Tura wáketkuncha ataksha ístajrum tusan wakerimjai. Túramtai wi Jutía nunkanam weakui átum yáintkiatarum tusan atumin ístinian wakerimjai. ¹⁷Nuñkia ¿urukamtai túrachmaj? ¿Péñker enentáimtsukek “wetajai” tímiaj? ¿Wi Yus-shuarcha nunisan, jimiará chichamtiniaiti, tú enentáimtursarumek? ¹⁸Núchaiti. Yus tana nuna tímiatrusan umána nútiksarik iikia ii chichame umiktai tusar wakeraji. Jú chichamaik, “Ee, atsá” tátsuji. ¹⁹Wisha Serpanujai Timiutéujai Yusa Uchiri Jesukristunun ujakmajrume. Niisha jú chichamaik, “Ee, atsá” tíchaiti. Antsu nii tana nuna tuke umíawai. ²⁰Niijiaisha Yus tana nu tímiatrusan uminiui. Tuma asamtai Jesukrístu enentáimtukur “nii tana nuna nekas túrattawai” tu enentáimji. Tu enentáimsar Yusa naari shiir awajeaji. ²¹Atumniasha incha ikiakátmajnia nu Yúsaiti. Krístunu ajasu asakrin túrutmaji. Tura anaitiamak Niiniu awajtamji. ²²Tura ukunam ii achiktatjinia nuna, nekas amastatjai tusa Yus ni Wakanin ii enentáin apujturmaji. Nujai Niiniuitji tusar paant nékaji.

²³Atumiin itiurchatan wáinkiaij tusan nakitiakun atumí péprurin Kurintiunam jeachmajai. Wáitrakuñkia “Yus iirsati” tajai. ²⁴“Aya wi

tájana nútiksarmek Yus enentáimtustarum” waantu enentáimtumasar nu titin nakitijai. Yus nekas enentáimtusmaajai kakaarme. Antsu nekas warastarum tusar wakeraji.

2 ¹Tuma asamtai, atak kúntuts awajsajrum tusan nakitiakun, “atumí tunaari íwiartsurminin jeashtatjai” tímiajai. ²Wi atumin kúntuts awajkuncha, ¿yaki winia waramtikrusat? Aya atumek, wi nuik kúntuts awajsamjarmena nuke waramtikrusminiaitrume. ³Wi jeakun atumí tunaari íwiartsurminin kúntuts enentáimsaj tusan nakitiakun, nu papin áarmaj nútiksanak áarmajai. Warí, atumketrume winia waramtikrustin. ⁴Nekaatarum. Nu papin áarmiajai. Kúntuts awajsatjarum tusan áarchamjai; antsu ti aneajrumna nu nekaatarum tusan wakerakun áatramajrume.

Yajauchin túrana nu tsankuratin

⁵Túrasha kúntuts awajtusmia nu, aya wíniak kúntuts awajtushamai. Antsu atumniasha ishichik kúntuts awajtamsayi. Patasa chichasaj tusan “ishichik” tajai. ⁶Kame nu áishmañkan iruntra chicharkarum wáitkiasmarum nuke máakete. ⁷Antsu yamaikia tsankuratniuitrume. Shiir enentáimtikratniuitrume. Niisha imiá kúntuts pujus nú arant ajasáin tusarum túratniuitrume. ⁸Túrakrum nii nekas anearmena nu paant iniaktustarum tusan seajrume. ⁹Kame “aajna nuna umirtukartimpiash” tímiajai. Kame nuna nekaataj tusan wakerakun nu papin nuik áatramjarme. ¹⁰Átum tsankurearmena nú shuaran wisha núnisnak tsankureajai. Tura tsankuratin ákuinikia, wi tsankurajna nu ashí atumnian enentáimtusar, Kristu ímmianum túrajai. ¹¹Kame uunt iwianch Satanás in emestampratajtsa wakerana nusha nékaji. Tuma asamtai, túrawain tusar tsankuratniuitji.

Trúas péprunam Papru juákchamiania nu

¹²Krístunu shiir chichaman Trúas péprunam etserkatajtsan jean, ti péñker takastinian wáinkiamjai. ¹³Túrasha ii yachi Titiun wáinkiachu asan, shiir enentáimsatniun tujinkiamjai. Tura asamtai Trúasnumia aentsun áujsan ikiukiaran Masetúnia nunkanam wémiajai.

Krístujai nupetkamniaitji

¹⁴Kristu Jesusjai Yuska incha nupetmamtikramak ewekatmasuitji. Tuma asamtai Nincha ti shiir yúminsa pujajai. Tura kukují kunjúakui, ashí nékainia núnisan ii etserkamujai Kristu shiir chichamen Yuska ashí aentsun nekamtikiainiawai. ¹⁵Kristu in pujurtamu asamtai Yusjai nekapsamka iikia kunjúaji. Ii kunjúajnia nuna uwemtikramu ainia nusha tura uwemtikrachma ainia nusha nekapramnia ainiawai. ¹⁶Menkakatniunam weena nuka ii kunjúajnia nuna jakamnia mejea

nekapramji. Tura iwiaaku átinnium weena nuka iwiaaku átin kun_kúa nekapramji. Maa, nu túratniuncha ¿yaki jeá?

¹⁷Kame untsurí aents kuítian achiktaj tusar Yusa chichamen yapajinia núniskechuitji. Antsu Krístunu ajasu asar, Yus akupkamu asar, Yus íimmianum anantsuk esetsar étsereaji.

Yamaram chícham najanamu

3 ¹¿Nu tákurnin_kia, “ataksha nin_ki waantu enentáimtumainiawai,” tu enentáimsarmek? ¿Chíkich túruinia núnisrik, “Ju áishman nekas Yus-Chichaman etserin áiniawai” tusa papí aarma atumin iniaktustinkiaitaj? ¿Chíkich iniaktustin nú papí atumin seatniukaitaj? ²Atsá. Átumka ii papir_ia núniskechukaitrum. Ii enentáin nu papí áarmaiti. Tura nú papí áujSATniua núnisañ ashí aents atumí túramurí wáinkiar ii etserkamaj nu, Papru nekas Yusa takatr_in takaawai tusa nekaamnia áiniawai. ³Iis, tátsujak. Papí aarma núnisketrume. Nu papí KríStu áarmaiti tura iisha nú papí atumin sújaji. Tíntiaj_ainchu antsu iwiaaku Yusa Wakan_íj_iaí áarmaiti. Kayanmasha áarchamuiti; antsu shuara enentáin, auka, áarmaiti.

⁴Kame Krístunu asar, Yus enentáimta asar, nusha t́miniaitji, taji. ⁵Ju nékaji; imia iik pen_ké tujinkiaitji. Antsu ii túrajnia nu Yus ni kakarmar_in śramkurin túraji.

⁶Yamaram chichaman Yus najanamia nuna, incha pé_nker etserkatniun suramsaitji. Yaunchu aarma chichamnum, ashí takamtsuk umirkachrikia tuke jakamniuyaji. Antsu yamaram chichamnum, Yuska ni Wakan_íj_iaí yamaram wekasatniun śramji. Yusa kakarmar_íj_iaí nu chicham étserji. ⁷Yaunchu chichamnaka kayanam aar Yus Muisaisan susamiayi. Susamia nuí, Muisaisa yapi ti wincha ajasmiayi. Túrunamtai Israer-shuar ni yapin íistinian tujinkiarimiayi. (Túrasha nu wincha mushatmaki wémiayi.) Túrasha nu chichaman shuar umirkatniun tujintiakui, nu chichamsha aya tuke jákatniunam shuáran ejemiayi. Túmayatan_ winchaj_ají susamuyayi. ⁸Tura yamaram chichaman Yusa Wakan_í śramna nu, nuj_ají nan_kaamas shíiraiti. ⁹Kame mesertinnium ejeana nú chicham winchaj_ají susamuyayi. Tura nuj_ají nan_kaamas Yúsnum ejeana nú chichamka Yus íimmianum pé_nkeraiti. ¹⁰Iista; yamaram ana nu imiá shiir asa, yaunchu wincha amia núnaka mushatmamtikui. ¹¹Núkap arur pujuschamnia nu wincha áchamkia. Kame tuke átinia nuke nuj_ají nan_kaamas shíiraiti.

¹²Nu nékakur ti paant étserji. ¹³Muisais túramia nútiksarik túratsji. Ii uuntri Israer-shuar ni yapin wincha ajas men_kaan wáinkiar_ain tusa tarachj_ají ni yapin Muisaiska nukumakmiayi. ¹⁴Tura nu arantcha Muisaisan anturkarmia nuna enentáisha nukukmauyayi. Nekaatniun tujinkiarimiayi. Tura yamaisha núnisañ yaunchu aarma chichaman áujSAM antukar nekaatniun tujintiainiawai. KríStu enentáimtuschatin ni

enentáin nukukma nu yapajíáchmaiti. Aya Krístujai nuka yapajíámniaiti. ¹⁵Yamaisha Muisaisa áarmarín áujсар nékainiatsui, ni enentáimmiari nukurkamu asa. ¹⁶Tura aencha ni enentái yapajíá Uuntna ajasmataikia ni enentáimmiariya nukurkamu ana nu jusamuiti. ¹⁷“Uunt” tájinia nu, Yusa Wakaníiti. Uunt Yusa Wakaní pujana nui ankant ajastiniaiti. ¹⁸Nuke asamtai, iisha ii yapi tarachjai nukukchamu asar íspikia núnisketji. Uunt Kristu péñkeri iniakmaji. Kristu péñkeri nú núkap takaki wéakur, Krístujai métek ajastasa pujaji. Yusa Wakaníkia nuna túrawai.

4 ¹Yus in waitnentrama asa ni chichamen etserkatniun ataktamsaitji. Tuma asamtai yawetsuk takaaji. ²Uuka túratin ana nuyá tura natsanmai ana nuyasha kanakmiaji. Anankatai tusar wekaatsuji. Tura Yus-Chichamjai nakuratsji. Étserkur aya Yus-Chicham tana núchik étserji. Ashí aents nuna antukar, “nekas núiti Yus-Chicham” tiarat tusar túraji. Wi tájana nuna Yus nékawai. ³Uwempratin Chicham ii étserjinia nu páantaiti. Áyatik menkakatniunam weena nu “páantchaiti” tuñiawai. ⁴Uunt iwianch, ju nunká uuntri ana nu, nu aentsu enentáin ukusturuiti. Uunt Krístunu shiir chichaman ii étsermajai tsáapnin enentáimpraraín tusa ukustawai. Nu Kristu Yúsan ímiatrusan nakumui. ⁵Iisha étserkur, Jesukristu ii Úuntriñti tu étsereraji. Iikia atumí úuntriñtji tátsuji. Antsu, Jesus ii uuntri asamtai, atumi yáintriñtji, taji. ⁶Yaunchu kiritin aan Yus tsáapin ati tusa tsáapnin awajtsachmakia. Nú Yúsaiti ii enentáin tsaapnin awajtamsamia nu. Nu tsaapnijiaí ni shiirmarín, Jesukristu iniakmia nuna, ashí aents nekaawarat tusar Jesukristunun étsereraji.

Yusak enentáimtusar wekasatin

⁷Nu tsáapin imiá péñker ana nuna ii ayashiin Yus ikiusuiti. Tura ii ayashi kakarmachu, nuwe najanamua áanin asamtai, warí, kakaram ájini nu Yúsnumiáchukait. Ii aí nuna nekaawarat tusa Yuska ni tsáapnintrin ii ayashiin ikiusuiti. ⁸Tuma asamtai ii itiurchatri árentmaku árinin tuke jiinkimniaitji. “Itiurkatjik” taji, túrasha Yus yáinmaji. ⁹Aents pataaturmainiakrincha Yus ikiurmatsji. Emesrataj tukamá tujintiainiawai. ¹⁰Kame Krístun máataj tusa tuke wakermia núnisan incha tuke mantamataj turamainiaji. Túrasha jákachu asar Kristu kakarmari ii ayashiin iniakmaji. ¹¹Iisha Jesusna ajasu asar wekaajnia nui tuke tsawant tsúmainium jasattuk ajaji. Túrar ii ayashi jakamniaitiat nu ayashnium Jesusa iwiaakmari paant iniakmaji. ¹²Iisha Yus-Chicham étserkur ii ayashiin jasattuk ajaji, tuma aín atumsha umikiu asarum nekas iwiaaku atin wáinkiarne.

¹³Yus-Papinium yaunchu áarmanum: “Yúsan enentáimtusmajai, tuma asan etserkamjai” tátsuk. Iisha núnisrik Yus enentáimtusar wekaaji. Tuma asar étserji. ¹⁴Yus kakarmaiti. Uunt Jesusan jakamunmayan iniantkimiayi. Incha núnisan Jesusjai iniantamkittiaji. Tura atumjai

métek ni pujamunam juramkittiaji. Nusha paant nékaji. ¹⁵Atumsha untsurí aencha Yus-Chicham antukakrumin, Yus yáinmakurme. Tuma asamtai atumsha nútiksarmek Yus yuminsarum pujarme. Nujai Yusa naarí uunt awajsamuiti. Nu nekaar wáitsatin ashamatsji. ¹⁶Tura yaweatsji. Ii ayashí amuiki wéakuisha ii enentáinkia yamaram ajaki wéawai. ¹⁷Warí, ukunam tuke shiir pujustatjinya nu enentáimtakrika, ju nunkanam wáitiajnya nu, ti itiurchataitiat, aya yamaiya asa tiikia itiurchatchaiti, tura wárik nankaamawai. Túrasha ii itiurchatrijai Yuska ti shiir ana nuna amuukachmin ana nuna núkap suramsattaji. ¹⁸Tuma asamtai wáinjinya nu ti enentáimtatsji. Antsu wáintsujnya nu nekas enentáimtaji. Wáinjinya nusha aya yamaiyaiti. Antsu wáintsujnya nuka tuke amuukachminiaiti.

5 ¹Wats ju nékaji. Nayaimpiniam ii shiir pujustinian amuukachmin ayashin Yus najanamun ikiurtamsaitji. Aents najanachmaiti nu. Tuma asamtai ii ayashí emesnakuisha warí itiurtamajia. Nuka aaka núnisan amuukamniaiti. ²Ju ayashnium pujusar wáitiaji, taji. Yamaram ayash nayaimpiniam pujana nu achiktaí tusar wakeraji. ³Ayashtichu ajasaj tusar, yamaram ayashtin ajastaisar wakeraji. Pushía núnik yamaram ayash in nukurmaktai tusar wakeraji. ⁴Tura juí ayashjai pujusar wáitsar pujakur shiir enentáimtsuji. Arut pushí áiktinya núnisrik ju ayash ikiuktiaitsar tátsuji. Antsu yamaram pushí entsartinya núnisrik yamaram ayashnium tuke pujusmí tusar taji. Iista, ju ayash amuukachminkiaiti. Yamaram ayashnium pujusar tuke iwiaaku pujustatji. ⁵Yamaram ayashintin ajastinian iwíarturmaruitjinya nu Yúsaiti. Tura nekas túrattajai tusa ni Wakanin suramsaitji.

⁶⁻⁷Ju nékaji. Ju ayashnium pujajnya juinkia Uunt Jesusjai pujatsji. Tuma asamtai, wáinjinya nu ti enentáimtutsuk Yus enentáimtsusar tuke shiir enentáimsar wekaaji. ⁸Tura ju ayashniumia jíinkir Uunt Jesusjai tuke pujustaisar wakeraji. Tura túrattaji tu nékaji. ⁹Tuma asamtai ju ayashnium pujakrishia tura ju ayash ikiukrishia Uunt Jesus tuke waramtiksatata taji. ¹⁰Warí, ju ayashjai ii túramajnya nu ujakam, “pénkeraiti”, “yajauchiiti” Kristu turutit tusar, ashí iisha Uunt Kristui jeatniuitji. Tura ii túramujai métek akirmaktatji.

Krístun waramtiksatata taji

¹¹Tuma asamtai ju nékaji: Uunt umirkashtin ti tsúumainti. Nu nekaar ashí shuar Yus-shuaran awajsataj tusar ti takaaji. Tura incha Yus nékarmaji. Tura ii túramurí átumka atumí enentáin paant nékarme, tajai. ¹²Ataksha, “wi pénkeraitjai” tusar nu tátsuji. Antsu, ii túramu nekáa asakrumin enentáiniam ana nuna enentáimtsuk aya pátatkea nujai warainia nú shuar tsanumprutmainiakui yaintkiatarum tusar taji. ¹³“Wáurkaiti” turamainiajyash. Nusha warí, itiurtamajia. Ashí túrajnya

nu, Yus aneakur tura atumin yáintai tusar túraji. ¹⁴Kame ashí ii túrajnia nu Kristu anenkrattairjiaí túraji. Kame ju nékaji: Kristu ashí shuaran jaruku asamtai, Yus ímmianum ashí iisha jaka núnisaitji. ¹⁵Kristu ashí shuaran jaruk nantarkimiayi. Tuma asamtai Krístunam iisha iwiaaku pujajnia juí, iik wararmamtsuk, Kristu umirkatniuitji. ¹⁶Tura yamaisha aya ni ayashí írsar, “nu shuar péñkeraiti” tura “nu shuar yajauchiiti,” titin tujintiaji. Kame yaunchu aya ni ayashí írsar “Kristu yajauchiiti” tu enentáimsamiaji. Tura yamaikia yapajiár, esetsar enentáimkiur “Kristu Yusa Uchirínti” taji.

Krístujai yamarmaitji

¹⁷Tuma asamtai, Krístunu ajasúka yamaram najanamuiti. Yaunchu enentáimtai*ri* menkakayi. Antsu núnaka íkias ni enentáimtai*ri* nekas yamarmaiti yamaikia. ¹⁸Nunasha Yus túraiti. In nawampramkattsa Krístun akupturmakuitji. Tura nu etserkatniun incha ataktamsaitji. ¹⁹Yuska in tunaarínniutin asutiámatniun nakitiak Krístujai nawampramkamiaji. Tura incha Yus-shuartin nu ujaktinian ataktamsaitji. ²⁰Krístunu ataksamu asar, Yuska “winia Uchirjai nawamnaikiatarum” tusa ii wenejai atumin seatmarme. Tuma asakrin, Kristu náariin “túratarum” tájarme. ²¹Krístuka tunaan penké túrachmiayi. Túmanak ii tunaariin Yus Krístun makuumiayi. Nuna tura Krístunam makuuchmin awajtamsamiaji.

6 ¹⁻²Ni Papiriin Yus yaunchu Isayasan juna tímiayi: Tsawant jeamtai, ame seatmena nuna anturkamjame. Uwempratin tsawant jeamtaisha yainmajme.

Wats yamaikia Yus seatin jeayi. Yamái Yúsnum uwempratin jeayi. Tuma asamtai, iikia Yusa takatrin pachitkiajnía nu, Yusa anenkrattairi péñker achiktarum tusar seajrume. ³Tura “Papru etserkamuri ántrai” tíarain tusar chíkich yajauch enentáimtiktsuk péñker wekaaji. ⁴Nekas Yusa takarniurintji nuna paant nekaawarat tusar wáitiatrik, atsumayatrik, itirchatnum pujayatrik shiir katsunteaji. ⁵Ju itirchat wáinkiamji: katsumpramkarmaji; sepunam enketmáwarmiaji; charáa-charáa awajtamiarmiaji; takatcha ti itirchat takasmiaji; kanutsuk pujumiaji; tura tsukasha ti tsukammiaji. ⁶Tunáa nakitrar wekaaji; Yus-Chicham unuimiátraitji; shiir enentáijjai katsuntrar wekaaji. Chíkich shuar péñker awajeaji; Yusa Wakaní pujurtamkurin shuar nekas aneaji; ⁷nekas chicham ana nu étsereaji; tura Yusa kakarmarisha nú paant iniakmaji. Tura ni nemasrin nupettukain tusa suntar ni tantarin júana núnisrik iisha ii nemasri íwianch nupettamkajj tusar ii Yusri tuke umirkar wekaaji. ⁸Shuar shiir enentáimturmainiakrincha, yajauch enentáimturmainiakrincha, péñker chichartamainiakrincha, yajauch chichartamainiakrincha tuke Yusjai shiir wekaaji. “Wáitruiniawai”

turamainiakrincha tuke nekas chichaaji. ⁹“Nu aents nékatsji” turamainiakrincha Yusnumka nékanji; jákatin tsúumainnium wekayatrik tuke iwiaaku pujaji; asutiámuitiatrik mantamnatsji. Yusa takarniuríntiaj nu ashí nujají paant nekaamniaiti. ¹⁰Kúntuts pujayatrik ii enentáinkia waraaji; kuítrinchaitiatrik chíkich shuar kuítrintin awajeaji; penké takakchiatrik ashí wáinjji.

¹¹Yatsurtiram, Kurintiunam pujarmena nu, ashí paant ujakchamkajrum. Ti aneajrumna nu nékarme. ¹²Wikia atumin paant chichastajtsan wakerajrume; antsu átumka anenttsuk paant chichastin nakitrarme. ¹³Winia uchirua núnisnak chichaajrume; wi tuke paant chichaarjarmena núnisrumek atumsha atumí enentáin ana nu, paant ujakatarum tusan seajrume.

Yusa jeentji

¹⁴Yus-shuar Yus-shuarchajají tsanin̄ktinian enentáimsashtiniaiti. Warí, ¿Yusan umirna nú shuar, iwianchin umirna nú shuarjají métek enentáimiainiawak? ¿Tsáapnisha kiritjají máimtek áminkiait? ¹⁵¿Krástuka uunt iwianchjají nawamnaikiamniakait? ¿Yus-shuar Yus-shuarchajají tsanin̄ shiir pujusminkiait? ¹⁶¿Iwiaaku Yusa jeencha ántar-yus pujustinkiait? Tura atumsha iwiaaku Yusa jéentrume. Yus Niñki ni Papiriin juna tíchamka:

Niijjají tsaninkia pujusan, niijjají wekasartatjai tura ni Yusrjí átatjai; tura niisha Wíi aents ajasartatui.

¹⁷Tuma asamtai junasha tímiayi:

Nii matsatainia nuyá jíinkitiarum, tura niija kanaktiarum, tawai Uunt Yus; tura yajauch ana nu antinkiairap. Túrakrumninkia awayattajrume.

¹⁸Tura atumí Aparí átatjai; átumka winia uchir átrume. Nuna Wi imiá kakaram uunt Yus asan tajai. Tu áarmaiti.

7 ¹Tuma asamtai aneamur yatsurtiram, nusha, Yus tímia nu, in túramji. Nu tuma asamtai ii ayashí tura ii enentáisha yajauch ajasajin̄ tusar, ashí tunáa ana nuyá kanaktiniaitji. Túrar “Yusak nekas ii úuntrinti” takur, ii ayashísha, ii enentáisha takamtsuk tuke tsawant Yus íiktustiniaitji.

Kurintiunmaja shuar enentáimprarmatai Papru warasmiayi

²Ataksha nawamnaikiatai. Iikia shuar yajauch awajsachmaji; yajauch jintintrachmaji; anankachmaji. ³Makuutai tusan nuna tátsujai. Antsu nuik tíchamkajrum, iwiaaku pujakrishá jakarsha átumka ii enentáin áchitkiarme. ⁴Araantutsuk áatjarne; shiir enentáimjai. Itiurchatnum pujayatnak, atumin enentáimtusán enentairuí kakaram enentáimsán waraajai.

⁵Juì Masetúnianum penké ayamprachmaji. Antsu ti wáitsamji. Áentsnumià itiurchat wáinkiamji, tura ii enentáijjainkia ashamkamji. ⁶Tura kúntuts pujakrincha Yus ikiakátmartinian nékawai. Tuma asamtai Titiún akupturkamai. Nujajì winia enentáirun ikiakármai. ⁷Tura átum nii ikiakármarumna nuna Titiu ujakkamai. Nuna antukan ti warasmajai. Títiuka átum firsatin wakerarmena nuna ujakkamai; túrunamia nuna kúntuts enentáimmiarumna nusha, tura winia anentu asarum enentáimturumna nuna ujakkamai. Nuna antukan nú nankaamas warasmajai.

⁸Papí nuik akupkamaj nu áujsarum kúntuts enentáimprarme; núnaka nékajai. Túrasha ii akupmainchu túraitjai tátsujai. Eta, nuikkia tímiajai, túrasha yamaikia tátsujai. Papí áujsarum ishichik kúntuts enentáimprarumna nuna nekaan waraajai. ⁹Kame kúntuts enentáimprakrumin waraatsjai. Antsu atumí tunaarì nekaarum kúntuts enentáimprarum atumí enentáì Yusjajì yapajjá asakrumin nuna nekaan waraajai. Kame Yus wakerana nútiksarmek kúntutsrum katsuntearme; tuma asamtai iikia nu papijjajì yajauch awajsachji. ¹⁰Nekaatarum. Yus wakerana nútiksajñ kúntuts katsunteakka ni enentáì Yúsnum yapajjiáwai. Nuinikia ni tunaaríyã uwempraiti. Nuka “túruminchu túraitjai” tíchamniaiti. Antsu Yusan enentáimtutsuk kúntuts pujakka ni enentáì yapajjáshatui; yapajjítuk ni tunaaríyã uwemtsuk jakattawai. ¹¹Tura iistarum; Yus wakerana nútiksarmek atumí kúntutsrì katsuntearme. Tuma asarum wi áatjarmena nu esettsarum enentáimtusurme. Atumí túramurì ujakkatajtsa wakerimiarme. Tura nu tunáa nakitramarme; tura ashamkamarme. Tura yajauchin túramia nu asutiámarme. Tura winia anentu asarum wi timia tímiatrusrumek turatai tusarum ti wakerimiarme. Nu tura asakrumin péñker túrarmena nu, paant iniakmarme. ¹²Kame yajauchin túramia nuna ni tunaarìn iniaiasat tusan wakerakun, tura wáitias pujumia nu atak shiir enentáimsati tusan wakerakun nu papin áatramjarme. Tura nú nankaamas átum Yúsnum in anearmena nu nekamatarum tusan áatramjarme. ¹³Atum umikiu asarum waraakrumin iisha shiir enentáimji. Tura shiir itiaamarumna nuna Titiu waraak ujakkamtai nú nankaamas shiir waraaji. ¹⁴Atumin shiir enentáimtajrumna nuna Titiun ujakmajai. Tura nuna nekas aan Titiu nekaamai. Tuma asamtai atumin natsantrachmajrume. Kame atumin tuke nekas ana nuna tímiajrume. Núnisan atumnian Titiun tímiaj nusha nekasauyi. ¹⁵Tura Títiuka atumin enentáimturmas ti waraawai. “Jiatmaktajtsa winiatsuash” tusarum ti ashamkachurmek. Túmayatrum, nii péñker tati tusarum pachischarmek. Tura nii taa seatmarma nu umikiurme. Títiuka nuna enentáimias waraawai. ¹⁶Tura wikia, átum péñker túramurmin nekaan tura péñker túrawartatui tu enentáimsan waraajai.

Yus-shuarti ii kuitrj súsatin

8 ¹Yatsurtiram, Masetúnia núnkanmaya Yus-shuaran Yus waitnentainia nuna yamáí ujaktatjarne. ²Ti tiurchatnum nekapsamu ainiawai. Túmayatan warainiawai. Tura ti kuítrinha áiniayatan emeentutsuk kuítrinnia núnisan suiniawai. ³Juna wi paant nekaan ujaajrume. Niisha wakeramujai súsatniun jeainia nuna súiniawai; tura nú nankaamassa súiniawai. ⁴Yus-shuaran kuítrinchan súsartaitsa ti wakeruiniak, nu túratniun ti seatmarmaji. ⁵Tura ii enentáimmiaj nú nankaamas túrawarmiyai. Emka Yúsnum niñki sumamawarmiyai. Tura Yusa wakeramurj túratitaji tusar incha “yáintajrume” turammiaji. ⁶Tuma asamtai, “Masetúnia nunkanam kuit júuktin nankamamamna nu, Kurintiu peprunmasha amukta” tusar Titiu seamiaji. ⁷Atumsha ashí péñker túratin ti nékarme. Yus enentáimtustincha, unuiniartincha, ju nunkanmaya nekaatniusha, in aneatniusha nuka ashí nékarme. Wats, jusha túratarum. Yus-shuar kuítrincha ainia nu achikiarat tusarum Titiu támatái núkap susatarum.

⁸Kame atumí úuntria núnisnak akupeatsjarne, túratniuitrume tusan. Antsu chíkich shuar ni kuítrin susartasa ti wakeruiniá nuna atumin ujakan, atumí anenkrattairi nekaspashi tusan nekapsatajtsa pujajai. ⁹Ii uuntri Jesukrístu waitnenkartutairi nékarme. Ashí takakuyayi, tura atumin anenma asa kuítrincha núnisan ajasmiaji. Ju nunkanam kuítrincha núnis ajasmatai átum nayaimpiniam kuítriniak tusa túramiyai.

¹⁰Juna enentáimjai. Nuik uwitin, “yáintatji” tíchamkarum. Tura nu túratin ti wakerimiarme. ¹¹Nan kamamarmena nu yamaikia amuktarum. Nuik ti wakerimiarmena núnisrumek yamaisha súsatin jearmena nu susatarum. ¹²Iistarum. Ni kuítrin Yúsán nekas susatajtsa wakerakuinkia, nii jeana nuna susat tusa Yus wakerawai. “Jeana nú nankaamas susati” tátsui Yus.

¹³Chíkich ti núkap susarum atumnia táasat tusan tátsujai. ¹⁴Antsu ashí métek takusarat tusan tajai. Iis atumsha yamaikia ti nukap takakrume; nujai atuma nu súsatniuitrume. Ukunam chíkich tsawantaji átum atumashtarmeash. Nuinkia niisha atumin suramsarti. Nu túratin ákuinkia ashí métek takustin átatui. ¹⁵Yusa Papiriin yaunchu árman núnis tátsuk:

Núkap takusmia nu ampirchamiyai; tura ishichik takusmia nu atumachmiyai.

Titiu chíkich Yus-shuarjai Kurintiunam wetin ármiaji

¹⁶Tura wi aneajrumna núnisan atumin aneatniun Yus Titiu susamiyai. Tuma asamtai Yúsán yumiñsan pujajai. ¹⁷Iis, wi takui wétinian

wakerimiayi. Tura nú nan̄kaamas, atumin anenma asa, ni enentájjain wéawai.

¹⁸Tura ch́kich Yus-shuar Titiujai akupkatajtsa pujaji. Nu shuar Yusa Chichamen ti penker etserainakuí, ashí Yus-shuar iruntramunam nin penker áujmatainiawai. ¹⁹Tura nú shuarnaka ii tsaniakmarí atí tusar ashí Yus-shuar iruntramunam nuna anaikiarmiayi. Iijai kuítian jukiarti tusar anaikiarmiayi. Iis Yusa náarin ashí aents uunt najanawarat tusar tura ashí shuar atumí tsankarin nekaawarat tusar nu takat túratsjik. ²⁰Iis, ju kuit ii jukittiajnia nu, núkap asamtai, aents tsanumprutmawarajj tusar, Titiujai tura ju shuarjaisha wéaji. ²¹Yus ímmianumsha, aents ímmianumsha ii naka wekaajnia nuna nekaawarat tusar túraji.

²²Nu jimirá shuarjai ch́kich Yus-shuar akupeaji. Yusa takatrin takastasa ti wakerana nu nekas nékaji. Tura átum yáintin ti wakerarmena nuna nekáa niisha atumiin jeataj tusa ti wakerawai. Nuna túmak Yusa takatrin takastinian wakerana nuna paant iniakmawai. ²³Tura aisha ch́kich shuar Titium nekaataitsar anintruiniakuisha, “Titium Papru tsaniakmarinti. Incha yáinmaktajtsa Páprujai takaawai” titiarum. Ch́kich Yus-shuaran nekaataitsar anintruiniakuisha, “Yus-shuar akupkamu áiniawai, tura Kristu náarin shiir awajin áiniawai” titiarum. ²⁴Tura atumí anenkrattairí ashí Yus-shuar nekaawarat tusarum, nu shuar penker itiaatarum. Nu túrakrum, atumnia ii shiir tímiaj nu nekasaiti tu iniaktustatrome.

Yus-shuaran kuítrinchan súsarmia nu

9 ¹⁻²Kame átum Yus-shuar kuítrinha súsatin wakerarme; nuna nékajai. Tuma asan núnaka áatrachminiaitjarne. Atumsha súsatin wakera asakrumin wi nunasha shiir enentáimsan, “Akaya nun̄kanmaya shuar nuik uwitinia wakerusmatak yáintinian wakeruiniawai” tusan Masetúnianmaya shuáran ujaajai. ³Tura “kuítniasha súsatniun ti wakeruiniawai” tímiaj nuna, “wáitiaiti” tírajin tusan nakitiajai. Tuma asan, kuit susatajtsa wakerarum nu iwiaratarum tusan nu menaintiu Yus-shuaran nuna yáinmakarat tusan emka akupenajai. ⁴Wi ukunam Masetúnianmaya shuarjai atumiin jean, kuit súsatin tímiarmena nuna iwiarachman wáinkian natsarajj tusan, tura atumsha natsarajrum tusan túrajai. Warí, “súsatniun ti wakeruiniawai” tuke tu wéatsjak. ⁵Nu tuma asamtai, au takui súarme tu enentáimsarajin tusan ju Yus-shuaran emka akupenajai. Niisha nu kuítian iwiaratniun yáinmakarti, tajai. Nuñkia wisha Masetúnianmaya shuarjai ukunam jeawakrin, nu kuit atumsha nekas atumí enentájjainkⁱ súsatin wakerarmena nu nekaamnia átatui.

⁶Tura junasha paant tájarne: ishichik araana nu ishichik júuktatui. Núkap araana nusha núkap júuktatui. Kuit súsatniusha núniskete. ⁷Tura ashí shuar ni enentáin enentáimsana nunak susati. “Nakitiayatnak

susatjai” tíchamniaiti. “Turutainiakui susatjai” tíchamniaiti. Shiir enentáimias súana nuna Yuska shiir enentáimtai. ⁸Ashí pénker ana nuna suramsatniun Yus tujintiatsui. Nujají átum atsumashtatrumé. Tura chikichan yáintin núkap takustatrumé. ⁹Yus-Papinium ju aarma awai:

Kuítrinchan núkap susayi;
nuna tura, tuke túratin átatui.

¹⁰Arakmaun araakan súana nusha Yúsaiti. Tura yurumkan súana nusha Yúsaiti. Niisha átum pénker araatniun suramsattarme. Tura araarumna nujají pénker túratarum tusa araakrumin ipiampartatui.

¹¹Tuma asamtai núkap juukma takaku asarum, núkap súsatin jeattarme. Nuiñkia súarmena nuna ii uwejeyan chíkich Yus-shuar achikiar Yúsán yumínsartatui. ¹²Warí, ju kuit Yus-shuar kuítrincha súakrin ni atsumamuríncha atsumachartatui. Tura nú nankaamas Yúsán ti yumínsartatui. ¹³Nu shuar yáintai tusarum tura ashí Yus-shuar yaintai tusarum súatsrumek. Nujají Kristu shiir chichamen umiarmena nuna nékainiawai. Tura kuítrum emeentutsuk sua asakrumin niisha Yusa náarin uunt awajsartatui. ¹⁴Kame Yus atumin ti waitnentramainiakui kuítrum súatsrumek. Sua asakrumin nu shuar atumin ti anenmainiak Yúsán áujturmasartatui. ¹⁵¡Tura ashí iisha ii Yusrí ti yumínsatniuitji! ¿In súramjinia nuna yaki jintíartinian jeá?

Papru nekas jintintiamniaiti

10 ¹Wats, “Papru iijjají pujak péejchach ajawai, tura yajá pujak kakaram chichaawai” chíkich shuar turutainiatsuk. Kame imia wiki Papru Kristu anenkartutairijjají juna seatjarum tusan pujajai. ²Atumí weatkamuriya shuar chichainiak “Papru ni tsaniakmarijjají ju nunkanam akupin ajastai tusar wakeruiniak jintintiaiñawai” turutainia nuna kíishtumaktajtsan enentáimjai. Wisha atumijn jean kakaram chichaschataj tusan, nu antukairap tu seajrume. ³Áentstanka nunkanmaya áentsuitji, túrasha jú áents maania aintsar máaniatsji. ⁴Ju nunkanmaya nankejají máaniatsji antsu ii nankirí Yusa kakarmarinti. Nujají iwianchi kakarmari núpeteaji. ⁵Ju nunkanmaya aentsu jintiamurínkia tura waantu enentáimtumamurínkia, Yus nekaatniun itit awajea nuka, nu nankejají núpeteaji. Tura ashí ju nunkanmaya enentáimsatin yapajniak, emetamu áintsan, Kristun umirkarat tusar nu nankejají núpeteaji. ⁶Nekas umirkatin átum jeawakrumniñkia nuñkia umirkatniun tuke nakitiainia nu, Yusa kakarmarijají asutiáttaji, tajai.

⁷Atumsha aya pátatek ana nu iiyarme. Wats, shuar nekas Krístunu ajasman nekamaka, núnisan winiasha Krístunuiti tu enentáimtursatniuiti. ⁸Yusa kakarmarijají akupeaji tuke tákuncha natsaamatsjai. Nu kakarman atumin pénker jintintiatarum tusa Kristu suramsaitji. Kame atumin emesratniun suramsachuitji. ⁹“Ni áarmarijají

awaktamkatajtsa wakerutmaji” tátsurpash. Núchaiti. ¹⁰“Papru áarmari ti kakaram áiniawai, tura juí pujak kakarmachuiti; tura etserkatniuncha nékatsui” turutainiawai. ¹¹Wats, tuinia nuka junasha nekaawarti. Yajá pujakur kakaram áajinia núnisrik atumjai pujakrishá kakaram túrattaji.

¹²“Wiki imiá péñkeraitjai” tuinia nujai méteketji tátsuji. Ní shuaraitji tátsuji. Warí, niisha imia niñki nekapmamainiawai. Tura ni aī ísar “nu nankaamas péñkeraitjai” tu wéenawai. Nuna túruiniak netse túruiniawai. ¹³Antsu iikia, ii nekamatin jeajnia nú nankaamas waantu ajaschattaji. Ii takastatjinia nuí Yus Niñki jintintramji. Nu arant wéatsji. Kame atumjin takastinian Yus tsañkatramkaitji. ¹⁴Tuma asamtai, tájinia nu Yus tsañkatramka nú iniankas túratsji. Warí, iisha emka Kristu chichamejai atumjin jeachmakají. “Emka jeamji” tájinia nu ántar tátsuji. Kame Yus tsañkatramakrin jeamji. ¹⁵Chíkich takasmanum iikia waantu enentáimtumasar, “ii takatrínti” tátsuji. Antsu yamá enentáimtarmenta nú nankaamas Yus enentáimtustarum tusar wakeraji. Nu túrakrumninkia atumjin tuke takasminiaitji. ¹⁶Nuyasha chíkich takaana nuí takatsuk átum pujarmena nú arant pujuinia nusha Yus-Chicham ujaktaj tusar wakeraji. Nu túrar chíkich shuar takasma “íniuiti” tíchattaji.

¹⁷Tura péñker enentáimtumastaj tusa wakerakka, Yúsnaítjai tusa péñker enentáimtumasti. ¹⁸Warí, niñki “péñkeraitjai” tumamna nuka anturkachminiaiti. Antsu Uunt “péñkeraiti” tana nú shuar nekas péñkeraiti.

Ántar etserniun Papru áujmateawai

11 ¹Waurua núnisnak chichastatjana nu anturtukaintrumeash. Ee, anturtuktarum tusan seajrume. ²Atumniasha Krístunak anajmamtikrajrume. Tura nuwá chíkich áishmankan nékatsuk ni áishrijainkí nuatnaiya núnisrumek átum chikicha chichame umirtsuk aya ni chichamenkí umiakrumin Krístuí ejetaj tusan wakerajrume. Nuna túrataj tusan atumin akasmatajrume. Nu akasmaktinian Yus surusuiti. ³Túrasha íwianch ni nekatairijiai emka nuwá Epan anañkamia nútiksan atumniasha Yusa jintiyá awajimtikramar Kristu aneashstinian enentáimtikramprarmatai anañkamu aīrum tusan tsuutajrume. ⁴Warí, chíkich shuar Jesusnan nusháa éterkamujai táiniakuisha péñker ántarme. Tura nusháa wakan achikiam, nusháa chichamjai uwempramniaiti tu etserainiakuisha, nekasapitia tárume. ⁵Kame “Yúsnumiá akatramu asar etserkatin imiá nékaitji” tuinia nujai nankaamas nékaitjai, tu enentáimjai. ⁶Ti péñker chichastinian nékachiatnak winia nekaatairsha taamtsui. Núnaka ii túramurijiai tuke paant iniakmaji.

⁷“Akirkata” tútsuk Yus-Chichaman atumin ujakmajrumna nuí ¿tunáa túrajak? Átum ankant ajastarum tusan wikia péejchach ajasu asan,

“etserkamunam akirkata” tíchamjarme. ⁸Antsu atumin yáintaj tusan pujakun chíkich Yus-shuarnumiá kuítian suruiniakui achikmiajai. Nuna túran ni kuítrín emeentukmiajai. ⁹Tura atumjají pujusan atsumaknasha atumniaka seachjarme. Masetúnianmayá Yus-shuar taar, wi atsummiajna nuna surusarmiayi. Nu tuma asamtai tájarme, seachjarme tura seashtatjarme. ¹⁰Ashí Akaya nunkanam nuna ujaktinian suritrukchartatui. Nuna tákun Kristu nekasrijiaí tajai. ¹¹¿Urukamtai nuna taja? ¿Atumin aneachu asanak taja? Atsá. Aneajrumna nuna Yus nékawai. ¹²Túrasha wi túrajna nuna tuke turu wétatjai. “Papru túrana núnisrik túraji” tuinia nuna tíarain tusan túrattajai. ¹³Warí, niisha Yúsnumiá akatrachma ániawai. Anan̄kartin ániawai. “Kristu akatramurintji” tumá átaj tusa wekainiawai. ¹⁴Nusha urukaku túmait tíchamniaiti. Warí, imia Satanáskesha “nayaimpinmayá akatramuitjai” tumá átaj tusa wekaatsuk. ¹⁵Nuiñkia imia ni suntarisha péñkeran túrawai tumá atai tusa wekasachartinkiait; túrasha ni amuamurinkia tunáa túriarma nujai métek nekapmá asutiátin átatui.

Papru wáitsamia nu

¹⁶Ataksha tájarme “wáurkaiti” tu enentáimtursacharti. Kame “wáurkaiti” tu enentáimturiatrumek, chichastin tsan̄katruktarum. Ishichik waantu enentáimtumastaj tusan wakerajai. ¹⁷Tura waantu enentáimtumastaj tájana nu, Uunta tsan̄katramurijiaí tátsujai. Antsu waurka núnisnak chichaajai. ¹⁸Untsurí ju nunkanam uunt ajasar ti waantu enentáimtumainiakui wisha ishichik waantu enentáimtumastajai. ¹⁹Imiá nékayatrum waurka ainia nu shiir enentáimtusrum ánturearme. ²⁰Niisha atumin takamtikramainiakui, kasartamainiakui, atumí nérenniurí ajainiakui, yajauch chichartamainiakui, yapimin awattamainiakui ashí nu katsuntearme. ²¹Natsamayatnak tájarme iikia nu túratin kakarmachuuji! Wats, niisha araanainiatsna nuna wisha araantatsjai. (Waurka núnisnak chichaajai.) ²²Niisha Iprú-shuar ániakuisha wisha núnisnak Iprú-shuaritjai. Israer-shuar ániakuisha wisha núnisnak Israer-shuaritjai. Apráama weetri ániakuisha pai, wisha núnisnak. ²³Kristu takarniurintji, tuiniawai. Wikia aujai nan̄kaamasaitjai. Kame nuna tákun waurka núnisnak chichaajai. Kame nijiaí nan̄kaamas takasuitjai; nijiaí nan̄kaamas asutiámuitjai; nijiaí nan̄kaamas sepunam en̄keamuitjai; ti núkap jániñkiamjai. ²⁴Israer-shuar chikichkí achirkacharmai. Antsu tímiajni sen̄ku jea achirkarmai. Tura emka achirkarmia nui awa-awatatkua trainta nuiwi ejeyarmiayi. Tura nu tímiajni sen̄ku jea achirkarmia nuisha nútiksān̄ nujai métek awatturarmiayi. ²⁵Numijiaí menaintiú awatturarmai. Kayajai sha mantuatai tusa chikichkí tukurarmai, kanusha menaintiú wayamai wi en̄kempran wekaimiaj nui.

Tura nayaantsanam ajapén chikichik kashi nuĭ pujusan tsawarmajai tura nu tsawantcha tuke pujusmajai. ²⁶Ti nukap wekasaitjai. Tura entsá wekasan tsúumainian wáinkiaitjai. Tura kasa shuarjaisha, wíi shuarjaisha tura yajaya shuarjaisha tsúumainian wáinkiaitjai. Péprunmasha, kampuniunmasha, nayaantsanmasha tsúumainian wáinkiaitjai. Wait Yus-shuarsha yajauch awajtustaj tusar wakeriarmai. ²⁷Itiurchatnasha ti wáinkiaitjai; takatnasha ti takasuitjai. Ti untsurĭ kánutsuk pujusuitjai. Tsukamaknasha, kitiamaknasha wáitsaitjai. Ti ijiarmaitjai. Pushir táasmatai tsetsekrúĭ wáitsaitjai.

²⁸Tura nuna nanĕkaamas, kaarka kijin júkitniua núnisnak Yus-shuar péñker wekainiawash tusan ashí tsawant ti enentáimsan pujajai. ²⁹Chikichik Yus-shuar kakarmachu pujakui wisha kakarmachu nekapeajai. Shuar chikichan tunaanum ajuawarmatainkia wisha natsamakun kajekan wáitijai. ³⁰Maa, waantu chichastin ákuñkia, antsu winia kakarmachu awajtuinia nuna ujakan waantu ajasaintjai. ³¹Yus, ii Uuntrĭ Jesukristu Aparĭ ana nu (ni naarĭ tuke shiir awajsamu atĭ) wi wáitratsjana nuna nékawai. ³²Tamasku péprunam pujajĭ nu nunĕkanmaya akupin winia jinkiá juruktiaj tusa wakerak pepru tanish téntakma wáitirĭin suntaran apujsamiayi. Aretas uunt kapitĭán pujajĭ túramiayi. ³³Túrasha uunt chankinnium enĕketawar pepru aa tanishrĭ áanĕkamunam jĭiki itiararmiayi. Tu uwempramiyai.

Papru wáinkiamia nu

12 ¹Kame wiki shiir chicharmamsatniun nakítiajai. Túmayatnak íimiarjana nuna tura uunt Yus iniaktursamia nuna ujaktiniaitjarne. ²Kristun umirin ana nú áishmanĕkan nékajai. Nu áishmanĕ jimiará nayaimpin nanĕkaikin menaintiú nayaimpiniam junakniuiti. Nusha katurse uwí nanĕkaamasuiti. Kame ayashtiuk wakaashit, tura ayashtichu wakaashit. Núnaka nékatsjai; aya Yúsak nékawai. ³Tura nekas junakniua núnaka nékajai. Ayashtiuk wakaashit, ayashtichu wakaashit, núnaka aya Yúsak nékawai. ⁴Yus-shuara wakanĭ shiir pujutanium junakmiayi. Nuĭsha paant awajsachmin ana nuna antukmiayi. Nii antukmia nú chicham paant awajsatniun suritkiamuiti. ⁵Nu áishmanĕka túrunamurĭ nanĕkaamakuiti tajai. Tura wikia nanĕkaamakuitjai túmamtsuk, kakarmachuitjiana nuna paant ujaajai. ⁶Nanĕkaamakuitjai túmamtiaj tusan wakeraknaka nekas tímĭniaitjai, ántran tíchaintjai. Túrasha túratsjai. Winia túramuruk wáinkiarum winia chichampruk antukrum, waritia enentáimsarum nujajĭ métek enentáimtursatarum tusan wakerajai.

⁷Wi nayaimpiniam wáinkiamajna nu timiá péñker asamtai ántar waantu enentáimtumaschatniun, janĕki mesertinia núnisanĕ winia ayashruĭ najaimiatniun sunasmiajai. Nuka wi wáitsatin Satanásnumĭa

akupkamuiti. ⁸Nuka jurutkitia tusan Úntan menaintiú seamjai. ⁹Tuma ain Uunt winia turutmiaiyi “Atsá. Jaa pujayatmek winia waitnenkartutairjai shiir pujame. Shuar kakarmachun winia kakarmarun Wi suakui ashí aents nu shuara ayashijn winia kakarmarun wáiniainiawai.” Tuma asamtai, Kristu kakarmari winia ayashruj paant ati tusan kakarmachuitiatnak araantatsjai. ¹⁰Tuma asamtai, wi Krístun aneakui shuar katsekruiakuisha, kajertuiniakuisha, winia kuítrusha, kakarmarsha atsain waraajai. Kame ashí itiurchat ana nui kakarmachuitiatnak kakaram nekafejajai.

¹¹Wi “pénkeraitjai” túmankun waurua núnisnak chichaajai. Tura atumsha winia péñker chichartusminiaitiatrumek, túrachu asakrumin tu chichasjai. Warí, wi penké ántraitiatnak, “ti péñker akatramuitji” tumamainia nú nunkaachichuitjai. ¹²Atumjai pujumiaj nui, itiurchat ámanman katsuntran takasmiajai. Yuska ni kakarmarin iniakmastaj tusa ti uuntan aents tujintiamun túratniun surusmiayi. Nujai “Papru nekas winia akatramuruiti” tusa paant iniakmasmiayi. ¹³Warí, chíkich Yusshuaran yáinmiaj núnisnak atumniasha yáinmajrume. Áyatik atumin “kuit surusta” tíchamjarme. ¡Nu yajauchiitkiuinikia tsankurturtarum!

Papru atak tátinrin ujakmiania nu

¹⁴Jújaínkia menaintiú iwiarnarjai atumin ístaj tusan. Tura jeaknaka, “etserkamun akirkatarum” tíchattajrume. Atumí kuítrin wakeratsjai. Antsu atumin wakerajrume. Warí, winia uchirchakaitrum. Uchisha aparín kuítian ikiauntukchatniuiti. Antsu aparí ni uchirín kuítian ikiauntuktiniaiti. ¹⁵Atumniasha yáintaj tusan ashí takakjana juna ajapawaintjai, tura winia kakarmarnasha ashí emenkakaintjai. Wi ti wakeramaitiatrum átumka ishichik wakerutarminiñ túrawaintjai.

¹⁶Túrasha chíkich shuar chichainiak “Nekasaiti; Papru niniki ii kuítrin jurutramkichmaji. Túrasha anankartuatniun neka asa in anankramachmiashia” turutainiatsuk. ¹⁷¿Nusha itiura? ¿Shuáran wi akupkamaj nujai kuítrumin achikjak? ¹⁸Atumin írmasat tusan Titiun “wetá” tímiajai. Tura nin atamprit tusan chíkich Yusshuaran akupkamjai. ¿Titiusha kuítrumin juruttramkimkiarum? ¿Wisha niisha mai metek enentáimsar métek takaschamkají?

¹⁹¿Warí enentáimsarum? ¿Átum péñker ániawai turutik tusar nu tájik? Antsu, aneamu yatsurtiram, ii tájinia nu atumin Yúsnum ikiakártajrum tusar taji. ²⁰Wi atumiñ jeaknasha, wi wáitkiataj tusan wakeraj nuna wáinkiashtatjai, tu enentáimsan itiurchat enentáimjai. Tura atumsha wakerarmena núnisrumek wáinkiashtatrume, tu enentáimjai. Yajauch chicharnaikiatniuncha, yajauch enentáimtunaistinniasha, kajernaikiatniuncha, niniki enentáimtumastinniasha, tsanumpratniuncha, mái-tunai ajatniuncha, waantu enentáimtumastinniasha, yajauch

wekasatniuncha, ashí nuna wáinkiashtajash tusan itiurchat enentáimjai.

²¹Tura wi jeaknasha, átum yajauch túratniusha, tsanirmatniusha tura yajauch ti wakerarmena nu, yaunchu túriniarmena nu, untsurí shuártiram iniaisachurmena nuna nekashtajash. Tura enentáim yapajítsuk tuke tura asakrumin útchatjash tajai. Kame wi átum umikchamun nekaamtai Yus winia iniatsátrattawai tusan tsúumajai.

13 ¹Jujají menaintiú ístajrum tusan winiajai. Ashí iwiaratin ana nu, jimiará tura menaintiú shuara chichamejají iwiarnartatui.

²Wi atumjají pujachiatnak, atumjají pujáa núnisnak áatjarme. Yaunchu tunáa túrimiarmena nuna tura ashí shuártirmin wi nuik tímiajrumna nuna ataksha tájarme, wi atak tana tunaarum iwiareachkurminkia iniaisashtatjarme. ³Nuñkia wi Kristu kakarmaríjjají chichaajna nu nekaattarme. Nu nekaataj tusarum wakeratsrumek. Tura Krístuka kakarmachuchuiti. Antsu atumí enentáin kakaram takaawai. ⁴Kristu nekas kakarmachua nútiksañ krúsnum máamuitiat, Yusa kakarmaríjjají iwiaakuiti. Ayashnium Kristu kakarmachu nekapmia núnisrik iikia kakarmachuitji. Túrasha Yusa kakarmaríjjají ni takatrí takaaji. Nu atumin iniakmastatji.

⁵“Nekas Yúsan umirniuashitiaj” tusarum nekamatarum. Ímiastarum. Ántar Yus-shuarchaitkiurmeka Jesukrístu atumí enentáin pujurtama nu nekaattarme. ⁶Tura iikia ántar Yus-shuarchaitji nu nekaatarum tusan wakerajai. ⁷Tura átum tunáa túrawáirum tusar Yus seaji. Aents in péñker enentáimtikramprat tusar tátsuji. “Ántar áiniawai” túramprinin, átum péñker wekasatarum tusar wakeraji. ⁸Warí, Yusa nekas chichamejají túraji. ⁹Tuma asamtai, átum kakarmaitkiurminkia iikia kakarmachuitiatar shiir enentáimji. Atumsha nekas kakaram ajasúk tusar Yus tuke seaji. ¹⁰Atumin emesratin Yuska winia akuptatsui. Antsu Yus akuptukuiti atumin ikiakártinian. Tuma asamtai, wi atumíin jeaknaka kakaram chicharkajjrum tusan winitsuk ju papin áatjarme.

Amikmaawai

¹¹Ayu, yatsurtiram, shiir pujustarum. Krístunam tuke kakaram ajastarum. Yus shiir enentáimtikramprarti. Chikichík enentáik enentáimsatarum. Shiir awajnaisarum pujustarum. Tura Yus anenmarmena nu, shiir enentáimtikramna nu atumjají pujurtamsattarme. ¹²Yúsnum shiir enentáimtunaisrum amikmaanaisatarum. ¹³Ashí Yus-shuar ainia nu amikmaatmarme. ¹⁴Uunt Jesukrístu waitnenkartutairí, Yusa anenkrattairísha atumíin pujurtamsati. Tura Yusa Wakanísha tuke nemartamsarti. Nu atí.